

直隸絳州志卷之十二

孝義

周

申生晉獻公世子獻公誤信驪姬讒將殺之公子重耳謂之曰子盍言子之志於公乎世子曰不可君安驪姬是我傷公之心也曰然則盍行乎世子曰不可君謂我欲弑君也天下豈有無父之國哉吾何行如之使人辭於狐突曰申生有罪不念伯氏之言也以至於死申生不敢愛其死雖然吾君老矣國家多難伯氏不出而圖吾君伯氏苟出而圖吾君申生受賜而死再拜稽首乃卒

直隸絳州志

卷之十二

孝義

一

靈輒爲翳桑之餓人晉趙宣子田見而食之舍其半問之曰臣游宦三年矣未知母之存否今近焉請以遺之使盡之而爲之簞食與肉寘諸橐以與之旣而晉侯欲殺宣子飲之酒伏甲將攻之輒與爲公介倒戟以禦公徒而免之問何故對曰臣翳桑之餓夫也昔蒙公惠故報之問其居名不告今城北八里有哺餓坂靈輒廟在

鉏麇晉力士晉靈公使賊趙盾晨往寢門闢矣盛服將朝尙早坐而假寐麇退而嘆曰不忘恭敬民之主

也賊民之主不忠棄君之命不信有一於此不如死也觸槐而死

提彌明晉卿趙盾之右靈公飲盾酒伏甲將攻之明知之趨登曰臣侍君宴過三爵非禮也遂扶以下公噉葵明搏而殺之鬪且出明死之盾獲出奔

公孫杵臼晉大夫趙朔客屠岸賈滅朔族朔婦匿宮中生男屠岸賈索之急杵臼與其友程嬰取他兒衣以文葆匿山中程嬰謬告諸將攻之杵臼謬抱兒呼曰天乎趙氏孤兒何罪請活之獨殺杵臼可也不許遂殺杵臼與孤兒後真孤趙武出復故位爲之祭邑春

直隸絳州志

卷之十二

孝義

二

秋祀之

程 嬰晉大夫趙朔客朔被殺與友公孫杵臼謀匿朔子山中居十五年晉景公問趙後韓厥以實告乃召趙武程嬰復田邑及趙武冠乃辭曰昔我非不能死我思立趙氏之後今旣立我將下報趙宣孟與公孫杵臼武啼泣固請嬰曰不可杵臼以我爲能成事故先我死今我不報是以我事爲不成遂自殺趙武服齊衰三年爲之祭邑春秋祀之

北魏

吳悉達兄弟三人俱幼父母爲人所殺號慕感動鄉隣

及長爲報仇避地永安兄弟同居四十餘年讓逸競勞閨門和睦鄰人孤窘者輒解衣輟糧濟之鄉閭五百餘人詣州請刺史表贈其父渤海大守後圖改葬失父舊墓所晝夜哭禱於神出行所履地忽陷得父銘記因遷葬宗祖以下三世九喪哀毀如初有司奏聞旌其閭

北周

梁 慎九歲善文辭天性至孝授洛川曲周縣主簿親沒泣血設影供養出告入面不異生時墓側結廬負土益塚時有鳩翔醴泉之瑞絳州刺史孟說奏狀勅直隸絳州志

卷之十二 孝義

三

下旌表其門弟九思甫能言卽知孝親敬長後以孝弟徵尙嵐州錄事參軍操履清潔尋引退晨昏事父母遺像有如生日

唐

趙師舉父爲人殺師舉幼母改嫁仇家師舉長晝爲人傭夜讀書久之手殺仇人詣官自陳高宗嘉其孝赦之

義橋孝子嘗成橋於稷山縣南汾水上三十喪父母五十猶衰麻鄉黨捨氏不名貴之也

元

呂 祐字伯通晉安人至正二十六年城破有卒入室脅其母索貲不得揮刀欲砍之祐急以身蔽母奪其刃指盡落傷仆地良久而甦開目視母曰母幸無恙死可無恨遂瞑而死

姚好智居喪廬墓元史孝友傳作子智

明

陳 璽父恕任貴州參議卒於官璽扶櫬歸廬墓終喪天順閒旌表充貢入監任隆慶州判官

陶 治字時泰號石橋琰次子以父廕官兩浙運司同知親老不願仕進父促之謁選授右軍都督府都事未幾乞終養歸承顏順志左右無方親疾躬侍湯藥百方醫禱親沒哀毀骨立廬墓終喪庭產瑞芝咸謂孝思所感云

張 益字伯謙父聰卒於延益扶櫬歸逆旅主人不納櫬益依櫬露處風雨驟至不移也季弟增毆人誤至死益念弟未舉子爲代其罪會赦得釋生平不染聲色人號爲無塵翁子本慶陽府教授孫與行重慶府知府姚江史太史表其墓

鄭 恩正統六年歲大飢出粟千石以賑郡守上其事奉勅旌獎

王 貢三林人有義聲三林河堤圯衆推貢督修貢任勞盡瘁不閱月工完至今賴之兩薦賓筵壽九十九人稱百歲翁云

許 河例貢鴻臚寺序班萬曆十四年飢河偕族人許敦實各出百金助賑城南渡汾官橋歲用民力時修時圯河捐貲創建浮橋濟者稱便

梁 范字式菴例授太醫院吏目敦信義好施予董修學宮捐置義田聞喜三泉等莊嘗負租數百石貸錢數百緡范憐其貧悉爲焚券里人稱之

梁 蒞同里舉人陳紹吉除保安知縣未幾卒妻子扶直隸絳州志

卷之十二 孝義

五

櫬歸窆窆無告蒞倡里人張與行陶登陳紹吉妻梁范等各出百金或五十金協濟之紹吉妻子朝夕得贍焉萬曆二十一年本州判官汪卒蒞具棺以殮人稱篤行云有推贈

侯裕福大聶里民父懷玉病危號泣絕食籲天求代父病以愈尋被牛舐腸出氣絕隣人納而縫之遂甦時謂孝感事母張尤謹母卒與弟裕祿哀毀廬墓門旁枯井生甘泉嘗收養遺孤辛成金范長命撫之完娶回籍又拾還李晉臣遺金晉臣欲割其半以謝卻不受上憲旌之

孫 統字仰東桂林坊人魁偉有材幹丰裁峻整燕居獨處必正衣冠而坐慷慨好義排難解紛里人多賴之萬曆中居秦之三原邑人貸五十金如約以償乃卮酒款迎曰吾藉此爲母歲權子以仰事俯畜然義不可負吾舉家自此無生路矣言已泣下統慨然不受其償而焚券焉會秦大飢捐金以賑道殣相望市蓆斂埋之有推贈

韓 傑字漢卿例貢鴻臚寺序班業賈遊吳越胸次洒落綽有風致宗族貧者建義宅以處之生養死葬悉贍焉戚友稱之多方賑助捐金修學爲諸生倡生平

直隸絳州志

卷之十二

孝義

六

所積以仗義散盡家無宿春不愜也年五十二卒祀鄉賢

楊培基例貢光祿寺署丞好善樂施捐貲修城修學辛思恭萬曆閒年飢出粟五十石以賑上憲旌其義韓育中字統元萬曆丙午鄉魁幼失怙家貧勤學事祖以孝聞督學周公繼昌檄旌之

王宏先字孝叟南社人幼聰慧七歲能文十二補弟子員旋食餼好學不倦淹貫經史事母孝母疾侍湯藥彌月不解帶母沒勺漿不入口竟以哀毀致疾易篋時猶衣衰絰云撫憲蔡公懋德檄旌之題其墓

衛聚德王村人樂善好施族人貧不能辦徭役聚德捐置義田歲收租代完之又廣具棺以給貧不能殯者撫憲曹公爾正旌其門曰惠睦

來 童年十四家貧傭工於梁崇禎初大荒絳人飢死者壕坎皆滿童父死坎中歸求父屍不能獲號泣三日不食死

段時盛母病噎服藥罔效時盛徧求醫或云股肉可療乃割股和麵以進母遂愈

陶天長割股療親疾見平陽府舊志

梁從高庠生嫡母得咯血疾醫不治乃與兄應高各割臂肉一片煎藥奉母病遂愈人稱梁氏雙孝

陶 都字允諧琰裔孫幼失怙事祖師孟甚孝祖病醫藥罔效都截指瀝血書哀詞禱於神祖遂愈平生好義樂施賙人之急各憲俱旌之

馮 經字九有庠生母病割股和藥以進母遂愈上憲旌之

李國定庠生事親備極孝養親沒每飯供饌如生存上憲旌之

李思誠庠生崇禎閒歲屢飢兄弟三人尊母命捐三百金以賑奉勅旌其門曰賢母義方

孫枝妍庠生甲申之變賊入城執其父括餉枝妍給賊
釋父奉貲父得脫賊索貲不獲挺刃交加創甚閱日
死

韓無敦庠生崇禎末舉家避稷山後澗頭堡內夜半賊
入堡執其父人皆踰堡以去無敦曰父被執焉去之
遂與弟無期偕死難

楊 檣丁村人捐置義學延塾師訓童蒙置沃產十五
畝課租入爲館餼王大令震亨有碑記又捐資百金
歲權子母爲族人丁徭之費

張 塚北平原人性至孝父篤疾百方醫禱無效晨夕
直隸絳州志

卷之十二 孝義

八

顓天願相隨地下奉事竟先父沒之二日死

段世雲字祥吾好善樂施嘗於渡汾浮橋捐板百葉每
年給水手工食銀十四兩四錢子文錦繼之姪孫炳
然復捐板百葉人推世德有推贈

吳思聰勤儉治生好施濟崇禎閒歲頻飢出粟二百石
以賑又廣市蓆以瘞委骸壽臻大耋孫枝競秀人稱
積善之報云

趙 統號溪翁賈西寧嘗收木棉數萬斤鬻於市僕潛
輕其衡統偵覺折衡逐僕歲歉出粟減價以糶貧不
能償者盡蠲之有客郭世奇遺黃金數斤統拾諸邸

舍訪其人還之孫桐癸丑進士

張 真字子純少時買於秦上郡有僧行乞真每推食食之久而不厭僧行出錢萬緡以報真辭不受南遊雲閒晨瀉盥水於地地甃隙中受水甚虛怪發之有錢一罌亟掩之其不倖非分之獲類如此生平以孝弟著聞鄉黨重之有推贈以子與行貴贈奉立大夫

陶 祐字吉甫幼積學精於醫活人甚衆人有緩急輒傾所有應之貧不能償者焚其券子登壬辰進士

段世慶字光緝庠生性孝友尙義樂施崇禎間歲大稔輸粟煮粥以賑後疫作施藥以療病者又廣置棺以

直隸絳州志

卷之十二 孝義

九

給貧不能殯者闖寇入城聞其仁孝免追餉祀鄉賢陳鎮明字潛夫好讀書隱於商遇貧乏者力周給之嘗著復性語以自娛

衛登強性好義歲歉族人貧不能辦糧登強乃罄力田所積金代納焉一相者曰君相乏嗣然有陰隲紋五十後當舉子果驗

康丕承例貢闖寇拘兄丕景括餉丕承挺身代兄受刑無怨師吳某夫婦年老無依養生送死皆賴之崇禎辛巳歲大飢賑粥施藥全活甚衆嘗捐修學宮並城上炮臺城南石堤官渡亦頻施橋板焉祀鄉賢

張俊民字子英例授庫大使陞經歷崇禎間歲大飢俊民出粟爲富紳倡煮粥以賑多所全活

趙 熠庠生性正直排解息爭有功水利鄉人感之

趙 燿字明宇貢授平遙縣教諭崇禎閒流寇將入晉燿糾鎮人築城堡練鄉勇以禦寇復建堡於五龍岡寇至鎮人依堡以免

王 成中社人爲軍戶指揮有幹畧引鼓堆泉水溉三林田築堰開渠殫厥心力居民永賴

國朝

王家琮庠生居鄉以公正稱里人有隙片言平其爭各

直隸絳州志

卷之十二 孝義

十

悅服去明季郡縣舉報富民上官往來供應驛騷富民恒苦之家琮力陳諸州守遂永革

楊本篤字作舟庠生順治初土寇攻城從同知徐祚煥守城火藥適匱亟覓硝濟之寇乃遁城獲完城東南最下頻受水患本篤捐金悉力多方疏鑿沮洳乃去事祖父母父母以孝聞郡守旌之有推贈

李 柰字國珍年十四郡守李文潔辟爲掾執事謹恪李深器之臨行語曰可將論語小學熟讀玩味存心行事一一倣效不可甘爲人下以忝所生柰祇受惟謹歷事數守凡地方利弊當興革者必力贊之鄉黨

陰受其福云

李堯民字順則慷慨好義歲游飢里人皆束手待斃堯民各周給之咸賴存活次孫復泌康熙壬戌翰林有推贈

李憲可字叶吉號維則堯民子幼聰敏孝友篤學年十二遊庠弱冠食餼親沒哀毀勺漿不下咽蔬食終喪胞弟際可出繼叔氏仍以已業分給之皓首窮經著有經正錄格言偶記乙卯貢卒子復泌壬戌進士復沆辛未武進士復濤歲貢陽曲縣訓導有推贈

楊鐸事繼母以孝聞繼母弟三人極盡友愛撫姪若子歲壬申大飢捐貲賑濟子震成寧鄉縣教諭

直隸絳州志

卷之十二

孝義

十一

陳士元字善長庠生工詩文事繼母馮氏孝養備至馬雲騰庠生事母盡孝出粟賑飢

李模字聖木家貧勤學手不釋卷孝事繼母友愛兄弟無閒言

薛朝宰四歲失怙事母孝兄嫂早亡撫姪猶子董自秀號近泉性好學老而彌篤事親極孝養里隣貧乏者資給之

梁體復事母孝妻馬氏奉姑尤謹幼弟孤姪皆教之成立

謝 浩字文淵父聰生子四浩居長父卒浩撫訓諸弟
寬嚴並至諸弟率教維謹常調人之急貧無償者焚
其券鄉黨稱之弟儒爲郡椽屢代里人完逋賦名亞
於浩

謝君詔字榮宸早失怙祖寢疾不起君詔方幼躬侍湯
藥衣不解帶者數十日比長喜讀書坐卧斗室披覽
羣籍丰神瀟洒望之若仙

趙世科事父母及繼母皆克盡孝道見平陽府舊志

張懋修幼業儒父命元府掾公暇讀書不少輟守聞而
異之令卒業遂遊庠性篤孝父卒繼母雷氏遇之寡

直隸絳州志

卷之十二 孝義

三

恩意少不慊輒杖責冬跽積雪中母不命之起不敢
起聞者稱之里中稱貸者券盈篋嘗於元旦盡焚之
侯居才年七歲隨祖母張氏入山避寇張誤墜山谷居
才環崖號泣側身滾崖下抱祖母卧越兩晝夜餓垂
斃家人尋救獲甦娶張氏夫婦克盡孝養母米氏壽
九十七孫爵丙子舉人

李世和父沒於蜀徒步走千里求父骸遇舊役車起年
七十餘指藁葬處因扶柩歸

李顯祚字仲奕國學生性仁孝父疾不遠百里延醫調
治因益究心岐黃隨病製方用輒效

姚日章字君實孝友好義

翟志廣好義樂施年登百歲

梁 瑤出粟賑飢

耿惟哲出粟賑飢有推贈

吳 偉字巨卿庠生歲荒煮粥賑飢建義學置學田又嘗捐田爲族丁徭之費

郝 啟與弟升率婦事嫂賈氏能敬且和子孫五世同居

閻守瑞字小泉父大江樂善好施生七子瑞居長性剛方以孝友訓家家規嚴肅一錢尺布不入私室弟守

直隸絳州志

卷之十二 孝義

三

敘等敬之如父學憲旌之

儀兆羲字天一性孝友與弟兆祥析居仍以已產分給之教養二姪胥成立州人李某嘗稱貸未償遇於道涕泣言數日不舉火憐其貧更賙之又嘗焚逋券七百餘金年八十七無病

閻 雋字君美喜讀書事親孝嚴訓諸子務正學俱成名嘗倡建宋五子祠立嚶鳴社垂沒猶區畫社倉且以屬其子學憲州守俱旌之

任宗陟少以舅党冰壑爲師家貧事繼母甚孝修脯所入悉以供母冰壑雅重之

衛宜信字爾伸歲貢生讀書不事口耳志在力行家貧
孝養父母甘旨不少缺居喪盡哀三年不入內嘗於
稷山縣道上建茶亭行旅便之

黃以靜事親克孝蒙 旌建坊

張以奇字仲常幼失怙祖母與母貧無以養弱冠卽貿
易以供甘旨上事長兄下撫幼弟怡怡之愛老而彌
篤嘗手書孝第四則以訓其子

楊 園字猗邱庠生性仁孝母疾禱以身代伯兄已析
居館穀所入必分給與兩弟同爨從無閒言生平勤
學樂誨黨塾彬彬稱文學焉陽城少司農田六善誌
直隸絳州志 卷之十二 孝義 十四
其墓祀鄉賢

梁體壯字金渾恩貢考授布政司理問性孝友內外無
閒言講學訓課從遊甚衆葺橋施藥鄉黨稱之

段 彬康熙乙卯武闈第一慷慨好義設義倉備賑濟
先世有二段詩集栝捲手澤罔敢散佚命子弟珍藏
之

馮 承字石公號遠菴選貢壽陽教諭性孝友年五歲
避賊從母家樓上聞城陷驚呼曰我祖父危矣遽自
上投下從母急持之得不墜後事親疾執親喪哀毀
逾禮事况肅敬愛兼至嘗築亭榭於屏山日夕盤桓

以爲兄娛友愛老而益篤有推贈

柴平富字丕公歲貢性端方自幼言笑不苟比長聞李
子潛名往師之篤嗜小學內則諸書祖父母亡寢苦
枕塊不入私室者六年所著見總目

王 瑾字子懷康熙庚辰武進士幼失怙念孀母苦節
不忍遠離遂絕意仕進母性嚴少失意輒加呵責怡
然順受母容爲之霽聞伯父旅病瑾不遠千里徒步
省視調護以歸終身事之如父歲荒倡義捐賑貧民
多賴全金活

梁兆宣字孔昭性孝友撫孤姪如子好義樂施每遇歉
直隸絳州志 卷之十二 孝義 五
歲賑濟不厭再三至其修道路造橋梁勸義塾設茶
亭葺學宮繕祭器美不勝記數舉大賓州守旌之

王順正

薛崇正

周炫炫

董大成

馬獻圖

以上五人名列舊志事蹟俱不傳今仍之

寓賢

上古

雲陽先生養龍於絳北陽石山神龍池詳見古蹟

北魏

元 徽孝昌中避爾朱榮之難於此詳見鄉賢楊擿傳

隋

王 通讀書於馬首山清漣洞今有像存焉里人祀之

唐

薛仁貴投義軍於州今城南二里許有將臺遺趾俗傳其射雁處也

直隸絳州志

卷之十二

寓賢

六

郭 晞子儀第三子常從父征伐以功歷鴻臚卿河中軍亂殺節度使李國貞詔以子儀爲河東關內副元帥鎮絳州時四方多逐戎帥子儀至絳誅其元惡其黨頗不自安欲謀變晞知其謀選親兵四千伏甲以防之常持弓警夜不寐者七十日叛將竟不敢發以功拜殿中監累遷太子賓客封趙國公

依通志補

宋

歐陽修廬陵人薛簡肅公之壻居此最久

司馬光并州通判以事至絳從州之諸官尙書比部員外郎薛長孺巨卿國子博士劉常守道尹仲舒漢臣

判官陳大初寓之同遊鼓堆時嘉祐元年九月壬寅
日也

元

李溥光太同人號靈菴幼常爲僧寓絳州寂照寺西獨
樂洞讀書元授照文館大學士

國朝

楊藻鳳揚州興化縣人鄉寧籍家於絳順治閒登進士
歷任湖廣提學副使里居故人陶茂才惺疾歲時徒
步往候里人異之嘗著五千餘言辨西洋邪教

鄒登嶠字眉雪進士武進人愛山水深厚將卜居焉故

直隸絳州志

卷之十二

寓賢

七

別號汾亭居此數年從學者衆

隱逸 仙釋附

周

覆車者梁山崩以傳召伯宗遇大車當道而覆立而辟之曰辟傳對曰傳爲速也若俟吾辟之則加遲矣不如捷而行伯宗喜問其居曰絳人也伯宗曰何聞曰梁山崩而以傳召伯宗伯宗問曰將若何曰山有朽壤而自崩將若何夫國主山川故川涸山崩君爲之降服出次乘縵不舉策於上帝國三日哭以禮焉雖有伯宗亦其如是而已其若之何問其名不告請以見弗許伯宗及絳以告而從之

直隸絳州志

卷之十二

寓賢

六

宋

韋 退放誕不拘浪跡秦晉閒以詩自名嘗跨一白驢好着寬衣鶴氅醉則鶴舞石曼卿贈詩曰醉狂玄鶴舞閑卧白驢號其風致之高如此

明

李 貞洪武時劉基薦爲遂昌縣主簿靖難時隱居永樂二年徵至京師授官不就賜宴而歸

張 侑字廷儀北關人鄠杜王太史曰人始見廷儀或以賈易之及接其丰度聆其談吐無弗改容禮之者蓋江湖之豪傑士而賈隱者云

薛 蔓字德延安阜坊人少服賈四方所至仁人長者
必求通焉如鄠杜漢陂王公三原谿田馬公龍渚咎
公皆樂與之遊而接以道義未嘗以私干諸公重之
別則贈以詩詞晚年倦勞不復出諸公聞問不絕居
鄉與達尊九人倣者英會孫國民以鄉薦知真寧
崔呈德修眉廣額丰儀秀整荷擔賣油口不二價人稱
長者弟呈秀天啟朝附魏璫以御史驟陞工部尙書
呈德仍賣油不之問也魏璫敗呈秀伏法逮及逆屬
呈德以賣油獲免里人黃希聲比於武侯緒云

仙釋

附

直隸絳州志

卷之十二

仙釋

九

唐

慧

涉俗姓楊幼從知深出家日誦數千言遊方叩師

無能難者嘗入秦寓麥積山石室造百法論抄一十

六卷涸井泉應因是絕筆至蜀以法殪術士妖猴還

憇中條山竹林精舍造維摩搜微記畧科般若心經

抄無常經真釋四分律科共二十六卷晚歸絳衆爲

創菴屏絕世俗將化預戒衆三分其軀一投水中一

擲郭外一隨煨燼勿塔勿銘以違佛戒言已昇座而

化異香連日雅樂夜聞茶毗獲舍利百餘粒舌不壞

色如黃金

僧法雲絳州人著辨量三教論三卷又十王三業論十卷見唐藝文志

南宋

王道源避金亂隱居西山之麓羽化後人卽其地爲清濂洞塑像其中疑卽舊志所謂土人稱業坯者王道是也見列仙傳

仙姑馬守明生時彩霧滿室異香聞隣里長師甘泉女冠張妙清自永和上桑里來州舍於李氏明年上元日無疾枕肱以逝氣微而容不變三日復甦語人曰予暫遊紫府再會羣真自此不復穀食但果蔬飲水

直隸絳州志

卷之十二

仙釋

三

而已日夜靜坐語吉凶輒驗有疾求醫者不假砭藥呵禁立愈歲旱蝗設壇密祝三日雨降蝗滅士庶擇三林南社地爲建廟觀一日沐浴更衣大集徒衆曰內外行各皆勉旃予有先師之約不可違期遂留一絕云七朶金蓮數暫來人世閒闕功今補足紫府却歸還筆落端坐而逝見列仙傳

元

智 揖曲沃人通三乘教尤明禪理至元初爲絳州寂照院禪師戒律精嚴儀度整肅教風日盛歸依者愈衆杜門不出人或見其往來里巷多異之壽八十一

終茶毗得舍利數百粒

秦凌霄絳州泉掌鎮人父母俱早逝年二十歲叔兄爲之娶室凌霄拜堂畢其夜忽逝去學道於雲邱山性嗜靜嫌雲邱生徒繁囂徙隱於州之清溪洞煉丹施藥四方有疾疫者服符立愈康熙三年重陽日於泉掌玉泉宮端坐而逝

定 珍絳州人住稷山縣坦然寺焚修苦行四十餘年於康熙二十八年端坐而化一號寶峯大士

周

辛 廖晉大夫初畢萬筮仕於晉遇屯之比辛廖占之曰屯固比入吉孰大焉震爲土車從馬足居之兄長之母覆之衆歸之六體不易合而能固安而能殺公侯之卦也公侯之子孫必復其始

史 蘇晉卜筮之史獻公卜伐驪戎史蘇占之曰勝而不吉公伐而克之獲驪姬有寵卒致禍亂後筮嫁伯姬於秦遇歸妹之睽史蘇占之曰爲雷爲火爲羸敗姬車說其輟火焚其旗不利行師敗於宗邱歸妹睽

直隸絳州志

卷之十二

藝術

三

孤寇張之弧姪其從姑六年其逋逃歸其國而棄其家明年其死於高梁之虛及秦穆公伐晉獲公明年歸惠公而質其太子圉又八年惠公卒文公入殺懷公於高梁言胥駘焉

卜 偃晉掌卜大夫獻公伐虢問卜偃曰吾其濟乎對曰克之公曰何時對曰其九月十月之交乎後果驗襄王出居鄭文公將納王使卜偃卜之吉遇黃帝戰於阪泉之兆筮之遇大有之睽曰戰克而王饗吉孰大焉卒納王王饗禮命之宥

史 援趙史趙盾夢見叔帶持要而哭甚悲已而笑史

援占之曰夢甚惡非君之身乃君之子後盾子朔爲屠岸賈所誅

巫 臯晉梗陽人荀偃夢與厲公訟弗勝公擊墜其首戴而奉之以走見臯他日見諸道與之言同臯曰惟有事於東方則可以逞乃請悼公伐齊師還偃生瘍於頭而卒

師 涓晉樂師晉平公鑄大鐘工皆以爲調矣師曠曰不調後世有知音者將知鐘之不調也至於涓而果知鐘之不調也

宋

直隸絳州志

卷之十二

藝術

三

薛化光善數術嘗以平晉策于太宗行在召見罷歸適子奎始生撫其首曰是子必至公輔後果執政

明

王復丸善草書莊烈帝鑒賞之謂有北人勁氣嘗下御帖令書數幅以進

朱成鑑好琴善寫竹

朱俊樞有草書杜律行世

朱俊栲工畫

朱俊樹號寧齋工畫

朱充炆精醫工詩有草書千文石刻行世

朱充鰲號蘭江工畫

朱充蘇善唐隸書

朱鼎鐸善漢隸諸家書

段采臣善圖章有圖譜存

党玉崗姚平山弟子善繪畫

直隸絳州志

卷之十二

藝術

十四